

الجمعة 13 شوال 1404 هـ

Islam, c'est pas qui ou faire face au Qibla dans namaz, ni qui ou garde roza, faire haj ou donne zakaat seulement. Quelques personnes ti demande Rassoolullah (saw) qui çanne-là so Islam li meilleur ? (c'est-à-dire, qui çanne-là meilleur mussulman ?). Rassoolullah (saw) lè-re-là, réponne : "Celui qui évite faire du mal ène dimoune par so la langue ek so la main". (Bokhari Shareef, Vol. 1, Hadith No. 10)

Pareil couma la semaine dernière nous ti dire : Quand ou faire bons actions, ou besoin en même temps, arrête banne mauvais l'habitude. Parce qui banne mauvaises actions, li fini thawabs ou bons actions. Ène fois, Rassoolullah (saw) ti pé trape la main Hazrat Ali (r.a.) sortant depuis dans masjid alors qui certains ti pé causer dans ène coin, dehors. Nabi-é-Karim (saw) demande Hazrat Ali (r.a.) : "Est-ce qui ou conné ça banne-dimoune-là qui pé faire ?". Hazrat Ali (r.a.) réponne : "Ya Rassool-ullah s.a.w., zotte pé causer". Huzoor (saw) dire : "Non, zotte pé brûle zotte thawab". Hazrat Ali (r.a.) demander : "Ki façon ? Ya Rassoolullah s.a.w. ?". Nabi-é-Karim lè-re-là expliquer : "Banne-là pé faire ghibbat zotte frères, cause du mal pou zotte prochain, critiquer et dégrade zotte prochain. Eh Ali ! annoncer ki mussulmans besoin reste loin avec ça qualité quikchoses-là parce qui ça banne zaffaire là ène poison pou fruits zotte ibaadat".

Ou capave demander qui manière banne mauvais actions capave fini ou ibaadate so thawab, "rase" thawab-là, "balaye" thawab-là. Mo banne frères et soeurs, guette Hadith Muslim Shareef, rapporté par Hazrat Abu Hureira (r.a.) qui dire : "Ène jour, Rassoolullah (s.a.w.) ti pé assizé devant ène assemblée et Hoozoor s.a.w. demande ba sahabas : "Est-ce qui ou conné qui dimoune qui misère ?" - Sahabas réponne : "Ya Rassoolullah s.a.w., nous conné qui dimoune qui pas énan casse et quikchoses nécessaires, ça même ki misère". - Nabi-é-Karim (s.a.w.) dire : "Non ! Dans mo oummat, plus grand misères, c'est ça dimoune qui, jour qayamat, li pou présent devant Allah ki li ti faire beaucoup namez, roza, zakaat avec d'autres bonnes actions, mais seulement, dans duniya li ti zoure ène dimoune, li ti mette blâme lor ène dimoune, li ti coquin haq ène l'autre, li ti batte ène dimoune, li ti dégrade ène dimoune, li ti cause mal pou quicaine, li ti faire domindre. Allah Taala pou prend ça dimoune-là so néki, so thawab, et li pou partage ça so banne victimes et, après ça, quand nêki-là pas assez pou compense so victimes, Allah pou prend péchés so victimes et pou mette lor ça dimoune-là. Lè-re-là, Allah pou donne farishtas l'ordre : "Alle jette ça jahan-nami-là dans dozakh (l'enfer)". Rassoolullah (saw) dire guetter qui manière ène dimoune qui faire ibaadate et gagne thawab, qui manière à cause so mauvais actions, li perdi thawab-là et, encore, li prend péchés les autres et li alle dans jahannam".

RAPPELLE ENCORE CA KI ALLAH TAALA DIRE DANS QUR'AN SHAREEF (Sura 53, Versets 3 & 4) à propos Rassoolullah (saw) : "LI PAS CAUSER PAR SO PROPRE VOLONTE, MAIS (causer) ÇA QUI ALLAH REVELE LI".

D'après Hadith Abu Daoud, rapporté par Jaabeer bin Abdullah (r.a.), Rassool-ullah (s.a.w.) dire ki si ou pé faire ghibbat ène dimoune, ou pé faire du mal ène dimoune, ça veut dire qui ou pé donne li ou thawab et si, ou pas énan assez thawab, ou pé prend so péchés. Ca même action suffit pou amène ou dans jahannam. Faire bien attention ; ça, c'est la justice d'Allah !

Al-hassad, ça ène mot arabe qui veut dire JALOUSIE ou bien ou lé coeur pincer quand ène dimoune gagne Allah So Faveur. Pareil couma Allah dire dans Qur'an Shareef : (Sura 4 Verset 54) OU BIEN EST-CE QUI ZOTTE ; JALOUX DIMOUNES, POU FAVEUR QUI ALLAH FAIRE A CA BANNE -LA ?

Quand Allah Taala commence donne Nabi-é-Karim (s.a.w.) et banne sahabas So Faveurs, izzat et victoires lor banne ennemis de l'Islam, mussulmans faire progrès ; lè-re-là banne Yahudis et Munaafiks jaloux Rassoolullah (s.a.w.) et so sahabas. Banne envieux, banne gros poumons commencent faire ghibbat, cause du mal et faire blâme lor Rassoolullah (saw) et so sahabas ainsi qui tout sorte qualité domindre - tout cela à cause jalousie. Allah envoie Sura Al-Falaq et Sura An-Nas cotte énan ène Ayat parmi qui dire : "WA MIN SHARRE HAASEDIN IZA HASAD", (c.a.d. "ô Allah ! protège contre le mal de l'envieux quand li jaloux"). Mo banne frères et soeurs, ça aussi jalousie même quand ène dimoune pé faire progrès alors qui ou penser qui li pé descende, li pé tomber. Ou encore : progrès qui ène dimoune pé faire, ou lé coeur pé brûler. Ca ène grave maladie et nous demande Allah Taala sauve nous de ça maladie-là.

Li ène l'occasion /.... Page 2 Verso

Li ène l'occasion pou ène mussulman tester so imaan quand li trouve ène frère qui ti misère commence gagne Allah So Faveur et amène ène la vie aisée, quand ène frère qui pas ti énan travail gagne travail et progresser, quand so frère gagne ène promotion, quand so frère pé range ène la case, quand ène ti fille gagne ène bon demande, en bref, quand ou trouve progrès les autres. Couma Imam Al-Ghazali (r.a.) dire dans Ahya'ul Uloom : "Si lè-re-là, ou lé coeur content, ça veut dire qui ou énan bon imaan, ou imaan li ferme ; si, par contre, ou lé coeur pincer, brûler, vine petit, ça veut dire, qui ou imaan faible et ou énan maladie jalousie dans ou lé coeur. De suite, besoin demande doahs qui "Allah sauve moi de ça mauvais l'habitude (Jaloux) - là".

Parce qui, mo banne frères et soeurs, jalousie li maladie Ibliss qui, à cause so l'orgueil et manque du respect ène Nabi, Hazrat Adam (a.s.), Allah ti mette li dehors du Jannat malgré tous ça quantité ibaadates qui li ti pé faire-là. Là-aussi, au lieu li repenté et demande maaf (pardon), qui li faire ? Li persister dans so jalousie quand li réaliser qui li en dehors jannat alors qui Hazrat Adam (a.s.) et Bibi Hawwa zotte dans jannat. Ibliss faire dokha Hazrat Adam (a.s.) et Bibi Hawwa et, par la suite, ça deux-là aussi sorti dépi jannat et vine lor la terre. Finalement, Hazrat Adam (a.s.) et Bibi Hawwa demande doahs et Allah faire zotte maaf et redonne zotte proximité avec Allah. Mais Ibliss li, li encore pé mette jalousie dans lé coeur banne insaan.

D'après Tafsir Abné Kathir, Hazrat Jibrail (a.s.) ti emmène ça doah-là et dire : "Ya Rassoolullah (s.a.w.), lire ça doah-là et ou l'ennemis et banne ki jaloux ou, pas pou capave faire narien, parce qui Allah pou protège ou" :

BISMILLAHE ARQIKA MIN KOULLE DAA'IN YOUZIKA WA MIN SHARRE KOULLE HAASEDIWN WA AYNIN ALLAHO YASHFIKA.  
 بِسْمِ اللّٰهِ اَرْقِيكَ مِنْ كُلِّ دَاۤءٍ يُّؤْذِيكَ وَ مِنْ كُلِّ شَرِّ لَوَّاسٍ مُّسْتَوِيٍّ  
 وَاللّٰهُ يَشْفِيكَ

NOTE : Hazrat Ali (r.a.) dire ki ça doah-là ou capave lire et souffler lor ou et tout ou famille et Allah pou sauve ou de banne envieux et mauvais lizié, dans travail, etc.

Ou capave lire 11 (onze) fois DAROOD SHAREEF, puis ou lire ça doah-là 11 fois et après ou-ré-lire 11 fois Darood Shareef.

Allah donne nous tous ène bon la vie, d'après Islam. Ameen

Tel. 2-1381 Khateeb Al Aqsa Mosque A. Jilani

COMMUNIQUE DU WAQF BOARD - HADJ 1984.

Le public musulman est informé que le Gouvernement a confié la tâche d'organiser le Hadj annuel au "BOARD OF WAQF COMMISSIONERS".

Il est donc conseillé aux pèlerins (Hajjés) éventuels de se mettre en contact avec M. Ramtoola ou M. Beebeejaun à AIR MAURITIUS, Rogers House, pour le passeport, le visa, le billet d'avion et d'autres formalités requises, au plus tard le 27 JUILLET.

Le coût du billet d'avion est de Rs 9,768.- taxe comprise. Chaque pèlerin doit se munir d'une photo passeport et la somme de Rs 1,420.- (équivalant à 374 S. Riels) pour les frais à Jeddah (Tanazzul).

L'avion spécial, pouvant accomoder 150 pèlerins, quittera Plaisance pour Jeddah le 21 Août, 1984 à 06.00 hrs a.m. et le retour Jeddah - Plaisance se fera le 26 Septembre, 1984 à 08.00 hrs a.m.